

I. C. hostibus obviam ultro procedit, & à Iuda proditus, capitur.

CXLIII. Iudas cum accepisset cohortem, & à Pontificibus & Phariseis ministros, venit illuc cum lanternis, & facibus, & armis. Iesus autem sciens omnia, quæ ventura erant, processit, & dixit eis: Quem quæritis? Responderunt ei, Iesum Nazarenum. Dicit eis Iesus: Ego sum. Iudas autem, qui antecedebat eos, accedens ad Iesum, osculatus est eum. Ut ergo dixit eis Iesus: Ego sum, abierunt retrorsum. Iterum interrogavit eos: Quem quæritis? illi dixerunt Iesum Nazarenum. Respondit Iesus: Dixi vobis quia Ego sum. Cohors ergo, Tribunus, & Ministri Iudæorum manus injecerunt in Iesum, & ligaverunt eum. Ioann. 18. vers. 3.... 12.

I. C. auriculam Malchi, à Petro amputatam, sanat.

CXLIV. Simon Petrus unus ex his, qui erant cum Iesu, eduxit gladium, & percutiens Malchum servum Principis Sacerdotum, amputavit auriculam ejus dexteram: quam cum tetigisset Iesus, sanavit; dixitque Petro: Mitte gladium in vaginam; qui acceperint gladium gladio peribunt: calicem, quem dedit mihi Pater, non vis ut bibam illum? & conversus ad Iudæos, queritur quod ad capiendum se, qui quotidie inter ipsos fuerit, eosque docuerit, nunc venerint tanquam ad Latronem. Matth. 26. vers. 51. 52. Marc. 14. vers. 47.... 49. Luc. 22. vers. 50.... 53. Ioann. 18. vers. 10. 11.

I. C. à Discipulis relinquitur, Ioannes captus effugit.

CXLV. Tunc Discipuli ejus relinquentes eum, omnes fugerunt. Matth. 26. vers. 56. Adolefcens autem (Ioannes) qui sequebatur Iesum, amictus sindone super nudo comprehensus fuit, at ille rejecto sindone, nudus profugit ab eis. Marc. 14. vers. 50. 52.

I. C. comprehensus ducitur Ierosolymam, primò ad Annam Caïphæ socerum, ad cujus ostium Petrus Christum negavit, sed & Christus à ministro alapâ caditur.

CXLVI. Et adduxerunt eum ad Annam primùm, socerum Caïphæ, qui erat Pontifex anni illius. Erat autem Caïphas, qui consilium dederat Iudæis: Quia expedit unum hominem mori pro populo. Sequebatur Iesum Simon Petrus, & alius Discipulus notus Pontifici. Petrus autem stabat ad ostium foris, & Discipulus alius, qui erat notus Pontifici, dixit ostiariæ, & introduxit Petrum, & dixit Petro ancilla ostiaria: Numquid & tu ex Discipulis es hominis istius? Dicit ille: Non sum. Pontifex ergo interrogavit Iesum de Discipulis suis & de doctrina ejus. Respondit ei Iesus: Ego palam locutus sum mundo. Ego semper docui in Synagoga, & in Templo, quo omnes Iudæi conveniunt, & in occulto locutus sum nihil. Quid me interrogas? interroga eos, qui audierunt quid locutus sum

ipsis: ecce hi sciunt, quæ dixerim ego. Hæc cum dixisset, unus assistens ministrorum dedit alapam Iesu, dicens: Sic respondes Pontifici? Respondit ei Iesus: si malè locutus sum, testimonium perhibe de malo; si benè, quid me cædis? & misit eum Annas ligatum ad Caïpham. Ioan. 18. vers. 13. 24.

I. C. ab Anna ad Caïpham ducitur, ubi quod se Christum Dei Filium confessus esset, reus mortis judicatur.

At illi tenentes Iesum, duxerunt ad Caïpham Principem Sacerdotum: ubi Scribæ & Seniores convenerant. Petrus autem sequebatur à longè usque in atrium Principis Sacerdotum, & ingressus intrò sedebat cum ministris ad ignem, ut videret finem: Principes autem Sacerdotum, & omne consilium quærebant falsum testimonium contra Iesum, ut eum morti traderent, & non invenerunt. Princeps Sacerdotum ait illi: Adjuro te per Deum vivum, ut dicas si tu es Christus Filius Dei. Dicit illi Iesus: Tu dixisti, ego sum. Tunc Princeps Sacerdotum scidit vestimenta suadicens: Blasphemavit, quid adhuc egemus testibus? ecce nunc audistis blasphemiam: quid vobis videtur? at illi dixerunt: Reus est mortis. Tunc expuerunt in faciem ejus, & colaphis eum cæciderunt: alii palmas in faciem ejus velatam dederunt, dicentes: Prophætisa nobis Christe, quis est qui te percussit. Matth. 26. vers. 57.... 68. Marc. 14. vers. 53.... 65. Luc. 22. vers. 63.... 71.

I. C. secundò, tum & tertio negatur à Petro.

Petrus sedebat foris in atrio, & accessit ad eum una ancilla, & ait eis, qui erant ibi: Et hic erat cum Iesu Nazareno, & iterum negavit cum iuramento; quia non novi hominem. Et post pusillum accesserunt qui stabant, & dixerunt Petro: Verè & tu ex illis es; nam loquela tua manifestum te facit. Tunc cœpit detestari, & jurare, quia non novisset hominem: & continuo Gallus cantavit, & recordatus est Petrus verbi Iesu, quod dixerat: Prius quàm Gallus bis cantet, ter negabis, & egressus foras flevit amarè. Matth. 26. vers. 69.... 75. Marc. 14. vers. 66.... 72. Luc. 22. vers. 54.... Ioann. 18. vers. 25.... 27.

I. C. à Caïpha ad Pilatum adducitur.

Mane factò, concilium inierunt omnes Principes Sacerdotum & Seniores populi, & Scribæ adversus Iesum; ut eum mortitraderent. A Caïphà vinctum adducunt eum in prætorium, & tradiderunt Pontio Pilato Præsidi. Exivit ergo Pilatus ad eos foras, & dixit: Quam accusationem assertis adversus hominem hunc? Responderunt, & dixerunt ei: Si non esset hic malefactor, non tibi tradissemus. Dixit ergo Pilatus: Accipite eum vos, & secundum legem vestram judicate eum. Dixerunt Iudæi: Nobis non licet interficere quemquam. Introivit ergo iterum in prætorium Pilatus, & vocavit Iesum, & dixit ei: Tu es Rex Iudæorum? Respondit Iesus,